



MANDATUM  
RECTORIS  
OB RESTITUTAM  
SERENISSIMO  
*DELPHINO*  
VALETUDINEM.



OS FRANCISCUS-NICOLAUS  
GUERIN, Rector Universi Studii  
Parisiensis, Omnibus & singulis ejusdem Uni-  
versitatis Doctoribus, Magistris, Clientibus,  
& Administris, SALUTEM.

NOSTRAM pietatē in REGIAM  
FAMILIAM per assiduas mœroris & gaudii vices exercet  
Deus Omnipotens : nimirum, ne Principibus Optimis, quæ  
optima sunt ab ipso dona, arroganter & ingraterè securi per-  
fruemur? Timuimus Saluti Publicæ plagam omni calamitate  
tristiore, nullâ fortunâ sanabilem. Dilectissimo Capiti, Tuo  
*DELPHINO*, Gallia, timuisti non breve aliquod & unius  
diei periculum, quale cùm, ante aliquot annos, cruentâ in

acie Patris comes & æmulus vincendi rudimenta poneret; sed longas funestæ luis moras, quæ ab ipso exortu minax, plena anxietatis in processu, vix aliquid spei territis heu! reliquerat. Qui tùm gemitus omnium, quæ suspiria? Decumbere pretiosum Orbi PRINCEPEM eâ peste contactum, quæ in Regum Palatiis sævire crudeliùs solet: PRINCEPEM illis dotibus instructum, illo ætatis flore! ita Nos Augustissimorum Parentum mæstitiam omnem pectore sentiebamus: Conjugis tenerriam, beatissimæ nuper Puerperæ, lacrymis miscebamus lacrymas: horum luctu nostroque jacebamus. Neque Gentein in suos Dominos propensissimam fallebat amor, suorum damnorum sæpè immodicus æstimator. Lugebamus solliciti virtutes expertas, quarum vel sola fama totam Europam nostrâ formidine perculerat.

At ecce tandem reviximus. Convaluit *DELPHINUS*; Gallia convaluit. Noluit Deus *REGEM* animi in populos tam paterni, propter quem liberorum numero lætantur privatæ Civium familiæ, orbari pignore unico, dulcissimâ suâ spe & imagine. Audiit planctus & vota *REGINÆ* sanctissimæ, tam alto vulnere hòc magis indignæ, quòd Filium, quem nascentem Deo, ut illa *LUDOVICI NONI* Parens, sacra-verat, sibi ad Dei gloriam unicè restitui Mater Christiana flagitaret. Non passus est optatissimo præmio defraudari invictam *DELPHINÆ* fortitudinem, quæ lecto jacentis affixa, in piis officiis dies noctesque pulchrè pertinax, usque persequitur ægrum curare, solari, ipsa impatiens solatii: naturæ dolorisque victrix: ficcis oculis, dum ipsi cor sanguineo fletu rumperetur: vultu placido & illâ fronte, quam serenant gratiæ, cùm omnia funesta, infanda horreret: ausa etiam letales halitus osculis combibere, verus tot heroùm sanguis, egregiæ animæ contemprix; quæ jam velut ovat suavissimo Conjuge, quem morti eripuit, quicùm non recusavit mori.

*ERGO* nunc omnibus exultat gaudiis Augusta Domus, quæ & piæ lætitiæ triumphum Templo Urbis primario jam intulit.

Beatam Domum ! cujus ex salute felix undique concentus exoritur ; cujus bonis omnes Gentes accinunt , ut inter tot totius Europæ gratulationes vix tuos sensus tuis PRINCIPIBUS imputare possis , ô Patria ! At hoc ipsum impetrati beneficii pretium indicat , pro quo nefas sit Principem Academiam vota non solvere , quæ nullis se non obligavit , ut impetraretur. Vivit DELPHINUS nostris Artibus excultus , Studiorum nostrorum Patronus. Aris affusi postulavimus ut viveret : concessi muneris grates ad aras referendæ sunt : quippe jubet hoc ipse PRINCEPS , qui , ut est grato in Deum animo , nullo plausu delectatur magis , quàm qui Religionem adhibet interpretem.

ITAQUE jubemus in singulis Collegiis intrà primam ab hujus Mandati promulgatione hebdomadam cantari Hymnum Eucharisticum TE DEUM.

PRÆTEREA , ne careat tam pulcher eventus ullâ lætitiæ significatione , Volumus , dilatis ad diem à Nobis indicendum ORDINARIIS SUPPLICATIONIBUS UNIVERSITATIS & præclaræ Facultatis Artium Comitibus , Ferias Academicas ad diem Martis decimum mensis Octobris prorogari ; quo die , pro more , Sacrum SPIRITUI SANCTO celebrabitur , & solitæ instaurandis Scholis Conciones habebuntur.

DATUM in Ædibus nostris SORBONÆ-PLESSÆIS , die Jovis trigesimo - primo mensis Augusti , anno Domini millesimo septingentesimo quinquagesimo - secundo.